

元史新編

元史卷九十

兵

元起漠北以武取天下

之雄至於囊括四海包

舉八荒中葉以後吞金平宋一統中外爲從來所未有其
兵數機密除蒙古親臣外莫能知之故舊史亦無從詳核
今攷其大綱則宿衛諸軍在內而鎮戍諸軍在外內外相
維以制輕重之勢方太祖時以博爾忽博爾朮木華黎赤
老溫爲四怯薛賜掇里班曲律之號漢語謂之四傑世領
怯薛之長爲武賁親臣分轄宿衛士萬人爲四番番三晝
夜輪直帳殿總司上之起居飲膳服御供奉警備非常博
爾忽爲第一番博爾朮第二番木華黎第三番赤老溫第
四番博爾忽早歿于陣太祖自領其一號耶可怯薛蒙古

語耶可者大也以天子自領之故言第一怯薛及赤老溫
早卒第四怯薛亦以右丞相代領其始皆元勳世胄出將
入相貴盛冠一時爲開國股肱心膂之寄及中葉以後增
設怯薛日多皆紈綺子弟覬希恩澤歲賜鈔帛以億萬計
非復太祖舊制矣及世祖時又設五衛以象五方始有侍
衛親軍之號各置都指揮使以領之而其後增置改易於
是禁兵之設不止于前且宿衛之用不徒屬橐鞬列宮禁
用之於大朝會則謂之圍宿軍用於大祭祀則謂之儀仗
軍車駕巡幸用之則曰扈衛軍守護天子之帑藏則曰看
守軍或夜警非常則謂之巡邏軍或歲漕至京師用以彈
壓則謂之鎮遏軍此皆天子禁旅所謂爪牙之兵也至其
四方鎮戍之兵則太祖太宗憲宗吞西域并夏金時以師

兵爲營衛惟畱皇弟皇子鎮守和林老帳其鎮戍各處者皆錯居民閒寺宇或立營帳于高丘曠野凡萬夫千夫百夫之長無廨居城邑者遇有徵發無文移惟遣使銜命大帥聞召卽整隊以行其立法簡易疏闊如此世祖混一南北中統以後始仿漢制有文檄符節有軍府廨舍駐城中又命宗王將兵鎮邊其重者爲和林元帥府鎮守舊都其西則阿力麻里亦多命皇子重臣鎮守以防西北諸王之侵犯而中原則設重兵于關中河洛山東皆蒙古探馬赤兵江漢以南名藩列鎮則各以新附漢軍戍焉星羅碁置保障干城屹然有槃固之安中葉以後承平日久解紐弛防將驕卒惰加以中朝撫馭失宜藩鎮闕於北流賊熾於南天下勢遂不可爲豈祖制之不善哉故綜其大概而馬

政屯田弓手以類附焉亦一代武備得失之林可爲殷鑒也

宿衛

武衛軍中統三年以侍衛親軍都指揮使領武衛軍及平李璫又取山東并海漣諸軍選其精銳充侍衛軍至元元年改爲侍衛親軍分左右翼置都指揮使八年改立左右中三衛掌宿扈衛從兼屯田國有大事則調度之至元十六年卅置前後二衛二十五年又以漢軍萬人如上都所立虎賁司營屯田二十六年以六衛六千人及大都屯田三千人及近路迤南萬戶府千人總萬人立武衛親軍都指揮使司掌修治城隍及京師內外工役之事又至元十六年立左都威衛一萬戶屬之東宮三十一年復以屬皇

太后改隆福宮左都威衛使司其右都威衛元初木華黎奉太祖命收札刺爾兀魯芒兀納海四投下立探馬赤軍既平金隨處鎮守中統三年以五投下探馬赤立蒙古探馬赤總管府至元二十一年樞密院奏以五投下探馬赤軍俱屬之東宮復置官屬如舊二十二年改蒙古侍衛親軍指揮使司三十一年改隆福宮右都威衛使司

唐兀衛唐兀者西夏國氏也至元十八年阿沙阿束言今年春奉命總領河西軍三千人但其所帶虎符金牌者甚眾征伐之重若無官署何以防閑遂立唐兀衛親軍都指揮使司以總之又有貴赤衛及西域親軍左右阿速衛軍各立萬戶府與欽察唐兀諸衛軍分屯南北口大和嶺舊隘其後又置康里衛及左右欽察衛凡平西域諸國收其

精兵以強畿輔

左衛率府至大元年命以中衛兵萬人立衛率府屬之東宮時仁宗爲皇太子言世祖立五衛象五方也其制猶中書之六部殆不可易遂命江南行省萬戶府選漢軍之精銳者萬人爲東宮衛兵立衛率府延祐元年改爲忠翊府未幾復改爲羽林親軍都指揮使司六年英宗立爲皇太子復以隸東宮仍爲左衛率府

右衛率府延祐五年以詹事圖滿迭爾所管速怯那萬戶府及迤東女真兩萬戶府右翼屯田萬戶府兵合爲右衛率府隸皇太子位下

忠翊侍衛至元二十九年始立屯田府大德十一年增軍數立爲大同等處侍衛親軍都指揮使司至大四年四月

移屬徽政院并以京兆軍三千入之至治元年始改爲忠翊侍衛

宗仁衛至治二年右丞相拜住奏先脫別鐵木叛時沒入亦乞烈思人百戶與今所收蒙古子女三千戶清州徹匠二千戶合爲行軍五千請立宗仁衛以統之於是命右丞相拜住總衛事給降虎符牌面如右衛率府又置行軍千戶所隸焉

龍翊侍衛天祿元年十二月立龍翊衛親軍都指揮使司以左欽察衛唐吉什等九千戶隸焉虎賁親軍都指揮使司左右翊蒙古侍衛親軍宣忠幹羅思扈衛親軍威武阿速衛親軍東路蒙古侍衛親軍及鎮守海口侍衛親軍各置都指揮使司又有女眞侍衛親軍高麗女眞漢軍各置

萬戶府

宣鎮侍衛世祖中統元年諭隨路管軍萬戶有舊從萬戶
三哥西征軍人悉遣至京師充防城軍至元二年增侍衛
親軍萬人內選女真軍三千高麗軍三千阿海三千益都
路千每千人置千戶百人置百戶以領之仍選丁力壯銳
者應役三年諭侍衛親軍非朕命不得發充夫役修瓊華
島士卒卽日放還十四年以蒙古軍與漢軍相參備都城
內外及萬壽山宿衛仍以耶速不花領圍宿事十五年以
總管張子良所匿軍二千二百二十二人充侍衛軍士十
六年選揚州省新附軍二萬人充侍衛親軍并其妻子遷
赴京師成宗元貞四年詔蒙古侍衛所管探馬赤軍人子
弟投充諸王位下身役者悉遵世祖成憲發還元役充軍

大德六年調蒙古侍衛等軍萬人往官山住夏仁宗延祐六年知樞密院事塔失鐵木爾言諸漢人不得點圍宿軍士圖籍係軍數者雖御史亦不得預知此國制也比者領圍宿官言中書命司計李處恭巡視守倉庫軍卒有曠役者則司之使無怠而已而李司計擅取軍數筆士卒在法爲過宜自中書與樞密遣人案之驗實以聞制可七年以紅城中都威衛係掌軍務之司屬徽政院不便命遵舊制俾樞密總之

圍宿軍世祖至元二十六年命大都侍衛軍內復起萬人赶上都以備圍宿舊時大朝會時皇城外皆無牆垣故用軍環繞圍宿成宗元貞二年始成牆垣南北西三畔皆可置軍惟御酒庫西地窄不能容以蒙古軍列衛及於周橋

南置戍樓以警昏旦武宗至大四年省臣等傳皇太子命以大朝會調蒙古漢軍三萬人備圍宿仍遣使發山東河北河南淮北諸路軍至京師復命都府左右翼右都威衛整器仗車騎六月以諸侯王駙馬等來朝命發各衛色目漢軍八百餘人至上京成宗皇慶元年增調欽察貴赤西域唐兀阿速等衛軍士九十人守諸掖門復命千戶一員帥領以巡邏延祐三年以諸侯王來朝命增圍宿軍士六千人爲萬人復命分左右部領其事更增色目軍萬人以備禁衛

儀仗軍世祖至元十一年上尊號受冊告祭天地宗廟調左右中三衛軍五千人爲蹕街清路軍武宗至大二年上尊號百官行朝賀禮樞密院調軍千人備儀仗天壽節行

禮亦如之三年上皇太后尊號行冊寶禮亦如之四年奉迎武宗玉冊祔廟亦如之至治致和天祿中凡祭享朝賀竝如前制

扈從軍世祖至元十七年發河西軍士及阿魯黑麾下二百人入備扈從武宗至大二年太后將幸五臺令騎卒六千人漢軍二千人扈從

看守軍世祖至元二十五年以軍守都城外倉初大都城內倉廩有軍守之城外豐閏豐寶廣貯通濟四倉無守者至是依都城內倉例每倉守軍五人成宗大德四年調軍五百人於新浚河內看閘武宗至大四年發阿速唐兀等軍參漢軍守備各門仁宗延祐元年以世祖影殿有軍士守之今奉武宗御容於大崇恩福元寺亦調軍守衛三年

增嶺北省守衛倉庫軍三百人英宗至治元年增守太廟外垣衛士八百人

鎮戍

世祖中統元年詔漢軍萬戶各於本管新舊軍內摘發軍人備衣甲器仗差官領赴燕京近地屯駐萬戶史天澤萬四百三十五人兼統所屬張馬哥解成乣叱刺斜良拔都馬軍奴鐵木爾趙奴懷勝都古等各數百人十一月命右三部尙書怯烈門平章政事趙璧領蒙古漢軍屯駐燕京近地平章塔察爾領武衛軍萬人屯駐北山漢軍質子軍及僉到民間諸投下軍於西京宣德屯駐復命怯烈門爲大都督管領諸軍分達達軍爲兩路一赴德興一赴興州其諸萬戶漢軍則令屯守潮河又命漢軍各萬戶屯懷

來緒雲中統三年以質子軍九百餘戶屯固安質子軍四百戶屯平灤州至元七年以金州軍八百隸東川統軍司還成都忽朗吉軍戍東川十一年以芒古台等新舊軍萬有千人戍建都調襄陽府生熟券軍千人鎮戍鴨池十二年詔發鞏昌路補僉軍三千人戍東川又選丁壯四千人守海州十五年三月分揚州行省兵於龍興府命鐵木不花領兵萬人赴江西合元帥塔出軍以備戰守又命江南諸路戍卒各散歸所屬萬戶屯戍初渡江所得城池發各萬戶部曲士卒以戍之久而亡命外傷者眾續至者多不著行伍至是縱還各營以備屯戍安西王相府言川蜀旣平城邑山砦洞穴凡八十三所其渠州禮義城等處凡三十三所宜以兵鎮守餘悉撤去從之九月詔發東京北京

軍四百人往戍應昌府其應昌府舊戍士卒悉令散歸又定軍民異屬之制及蒙古軍屯戍之地先是以李璫叛分軍民爲二而異其屬後因平江南軍官始兼民事凡以千戶守一郡則率其麾下從之百戶亦然不便至是令軍民各異屬如初制士卒以萬戶爲率擇可屯之地屯之諸蒙古軍士散處南北及還各奧魯者亦皆收聚令四萬戶所領之眾屯河北阿朮二萬戶屯河南以備調遣餘丁定其版籍編入行伍俾各有所屬遇征伐則遣之十六年二月命萬戶孛朮魯敬領麾下舊卒守湖州四月定上都戍卒用本路元籍軍士國制郡邑鎮戍士卒皆更相易置故每歲以他郡兵戍上都軍士罷於轉輸至是以上都民充軍者四千人每歲令備鎮戍罷他戍兵六月礪門魚通及黎

雅諸處民戶不奉國法議以兵戍其地發新附軍五百人
蒙古軍百人漢軍四百人往征之七月以西川蒙古軍七
千人新附軍三千人付皇子安西王復命闔里鐵木爾以
戍杭州軍六百九十人赴京師調兩淮招討小廝蒙古軍
殘自北方迴探馬赤軍代之八月調江南新附軍五千駐
太原五千駐大名五千駐衛州又發探馬赤軍萬人及夔
府新附軍俾四川西道宣慰使耶罕的斤將之戍幹端十
七年正月詔以他爾不罕守建都布吉台守長河西三月
同知浙東道宣慰司事張鐸言江南鎮戍軍官不便請以
時更易置之國制旣平江南以兵戍列城其長軍之官皆
世守不易故多與富民樹黨因奪民田宅居室蠹有司政
事爲害滋甚鐸上言以爲皆不遷易之敝請更其制限以

歲月遷調之庶使初附之民得以安業五月命樞密院調兵六百人守居庸關南北口廣州鎮戍士卒初以合必赤軍二千五百人從元帥張弘範征廣州因畱戍焉歲久皆貧困多死亡者至是命更代之復以揚州行省四萬戶蒙古軍更戍潭州十月發礮卒千人入甘州備戰守八番羅甸宣慰司請增戍卒三千從之十八年以合必赤軍三千戍揚州置鎮軍萬戶府於高麗以防日本十一月以征東畱後軍分鎮慶元上海澈浦三海口十九年命唐兀台於沿江州郡視便宜置軍鎮戍鄂州揚州龍興泉州等四省列城徙浙東宣慰司於溫州分軍戍守江南自歸州及江陰三海口又調揚州合必赤軍三千人鎮泉州又以臨川鎮地接占城及未附黎洞立總管府以隆興西京軍士代

上都戍卒還四川先是上都屯戍士卒其奧魯皆在西川而戍西川者多隆興西京軍士每歲轉餉不勝勞費至是更之二十年八月畱蒙古軍千人戍揚州餘九千人悉縱還揚州行省請畱三分之一塔刺渾曰蒙古士卒悍勇敢當千人足矣從之十月發乾討虜軍千人增戍福建行省以其地險盜多兵少請增蒙古漢軍千人二十一年詔潭州蒙古軍依揚州例畱千人餘悉放還十月增兵鎮守金齒國于漢軍三千人外再調蒙古軍二千人二十二年詔改江淮江西元帥招討司爲上中下三萬戶府蒙古漢人新附諸軍相參爲三十七翼上萬戶宿州蘄縣眞定沂郟益都高郵沿海七翼中萬戶棗陽十字路邳州鄧州杭州懷州孟州眞州八翼下萬戶常州鎮江潁州廬州亳州

安慶江陰水軍益都新軍湖州淮安壽春揚州泰州弩手
保甲處州上都新軍黃州安豐松江鎮江水軍建康二十
二翼每翼設達魯花赤萬戶副萬戶各一人以隸所在行
院二十四年調各衛諸色軍士五百人於平灤以備鎮戍
又發江西軍五千鎮守廣東二十五年調揚州省軍赴鄂
州代鎮戍士卒三月詔黃州蘄州壽昌諸軍還隸江淮省
調江淮行省全翼一下萬戶軍移鎮江西省從皇子脫歡
士卒及劉國傑麾下萬人皆散歸各營十一月增軍戍咸
平府二十六年命萬戶劉得祿以軍五千人鎮守八番二
十七年調各行省軍鎮戍江西以備盜賊調江淮省下萬
戶府軍戍福建先是丞相伯顏及元帥阿朮阿塔海等守
行省時各路置軍鎮戍視地輕重爲多寡厥後芒古台代

之悉更其法易置將吏士卒殊失其宜及福建盜賊已平
惟浙東一道尙畱賊巢詔復還三萬戶以戍守之合刺帶
一軍戍沿海明台亦怯烈一軍戍溫處札忽帶一軍戍紹
興婺州其寧國徽州初用土兵後皆與賊通盡遷之江北
更調高郵泰州兩萬戶漢軍戍之揚州建康鎮江三城跨
據大江人民繁會置七萬戶府杭州行省諸司府庫所在
置四萬戶府水軍舊止十所繼擇瀕海沿江要害置水軍
二十二所伺察水盜增錢塘海口戰艦百艘海船二十艘
二十八年調江淮省探馬赤軍及漢軍二千人於親王脫
歡麾下近揚州屯駐二十九年以咸平府東京所屯新附
軍五百人增戍女真地三十年詔放還西征探馬赤軍八
千人皇子奧魯赤及朮伯大王請畱其半從之又命思播

黃平鎮遠招募亡宋避役手就軍人以增鎮守又調四州行院新附軍千人戍松山

成宗元貞元年劉國傑言初鄂州省安置軍馬之時南面止是潭州等處後得廣西海外四州八番洞蠻等地疆界闊遠闕少戍軍復增四萬人今將元屬本省四翼萬戶軍分出軍力減少請增兵戍守從之二年五月以鎮守建康太平保定萬戶府全翼軍馬七千二百十二名調屬湖廣別於江浙省元管千戶百戶軍內發兵鎮守九月詔以兩廣海外四州城池戍兵歲一更代往來勞苦給俸錢選良醫往治其疾二年更代三年二月調揚州翼鄧新萬戶府全翼軍馬分屯蘄黃大德元年三月以湖廣省保定翼萬人移鎮鄂州河南行省言前揚州立江淮行省江陵立荆

湖行省各統軍馬上下鎮遏後江淮省移於杭州荆湖省遷於鄂州黃河之南大江迤北汴梁古郡設立河南江北行省通管江淮荆湖兩省地面大江爲東南天塹兩淮地險人頑當時沿江置三十一翼軍馬鎮遏後遷調十二翼前去江南餘有十九翼於內調發止存原額十之一二況兩淮荆襄自古隘要宜慮未然乞照沿江元置軍馬遷調江南仍前鎮遏省院官議不允三年三月詔各省合併鎮守軍福建所置者合爲五十三所江浙所置者合爲二百二十七所江西元立屯軍鎮守二百二十六所減去百六十二所存六十四所

武宗至大二年樞密院臣言去年日本商船焚掠慶元官軍不能敵江浙省請以慶元台州沿海萬戶府新附軍往

陸路鎮守以蘄縣宿州兩萬戶府陸路漢軍移就沿海屯
鎮臣等議自世祖時伯顏阿朮等相地制宜安置軍馬豈
可輕動前行省芒古台等請以水陸軍互換遷調世祖謂
其狂醉而發今欲以水路之兵習陸路之技驅步騎之士
而從風水之役難成易敗於事何補若爲禦備姦宄莫若
於水路沿海萬戶府新附軍三分取一與陸路蘄縣萬戶
府漢軍相參鎮守從之

仁宗皇慶元年詔江西省瘴地內諸路鎮守軍各移近地
屯駐延祐四年二月河南行省言本省地方寬廣所屬萬
戶府俱於臨江沿淮上下鎮守方面離省近者千餘里遠
者二千餘里猝有不測調度難及況汴梁腹心設立行省
別無親臨軍馬乞照江浙江西湖廣陝西四川之例別撥

隨省軍馬詔於山東河北蒙古軍河南淮北蒙古軍兩都
萬戶府設軍千人與之十一月陝西都萬戶府言礮門探
馬赤軍百五十名鎮守多年乞放還元翼樞密院臣議礮
門要地不宜放還止令於元翼起遣百五十名三年一更
其各翼漢軍鎮守礮門黎雅者亦令一體更代

泰定四年河南行省言所轄之地東連淮海南限大江北
抵黃河西接關陝洞蠻草賊出沒與民爲害本省軍馬俱
在瀕海沿江安置遠者二千近者千餘里乞以礮手弩軍
兩翼移於汴梁并各萬戶府摘軍五千名各設萬戶府隨
省鎮遏樞密院議自至元十九年世祖命知地理省院官
其議於瀕海沿江六十三處安置軍馬時汴梁未嘗置軍
揚州衝要重地置五翼軍馬并礮手弩軍令親王脫歡鎮

遏揚州提調四省軍馬此軍不宜更動設若河南省果用軍則不塔刺吉所管四萬戶蒙古軍內三萬戶在河南省之西一萬戶在河南省之南脫別台所管五萬戶蒙古軍俱在河南省東北阿刺安童等兩侍衛蒙古軍在河南省之北共十一衛翼蒙古軍馬周圍屯駐又本省所轄十九翼軍馬俱在河南省之南沿河置列縱有軍務足供調發從之

馬政

元起朔方俗善騎射以弓馬之利取天下蓋其沙漠萬里牧養蕃息太僕之馬殆不可以數計世祖中統四年立尙牧監旋升爲太僕寺屬之宣徽院後隸中書省典掌御位下大帳殿馬其牧地東越耽羅北踰火里圖麻西至甘肅

南暨雲南等地凡十四處周回萬里無非牧地馬之羣或千百或三五十左股烙以官印牧人曰哈赤哈刺赤有千戶百戶父子相承任事自夏及冬隨地之宜行逐水草十月各還本地朝廷歲以九月十月遣寺官馳驛閱視多寡有所產駒卽烙印取勘造冊其總數蓋不可知也凡病死者三則令牧人償大牝馬二二則償二歲馬一一則償牝羊一其無馬者以羊駝牛折納太廟祀事及諸寺影堂用乳酪則供牝馬駕仗及宮人出入則供尙乘馬車駕行幸上都太僕卿以下皆從先驅馬出健德門外取其肥可取乳者以行汰其羸瘦不堪者自天子以及諸王百官各以脫羅氈置撒帳爲取乳室車駕還京師太僕卿先期遣使徵馬五十醞都來京師醞都者承乳車之名也旣至俾哈

赤哈刺赤之在朝爲卿大夫者親秣飼之曰釀黑馬乳以奉玉食謂之細乳每醞都牝馬四十每牝馬一官給芻一束菽八升駒一給芻一束菽五升菽貴則其半以小稻充自諸王百官而下亦有馬乳之供醞都如前之數而馬減四之一謂之粗乳芻粟要旬取給於度支寺官亦以旬詣閑廄閱肥瘠又自世祖而下山陵各有醞都取馬以供祭祀事號金陵擠馬越五年盡以與守山陵使者凡御位下正宮位下隨朝諸色目人員甘肅吐蕃耽羅雲南占城蘆州河西雲南及和林及幹難河及怯魯連河及察罕海子木連河及和林稱海及上都大都所轄草地內及山東江南腹地有官孳生馬牛駝驢羊點數之處十四道牧地各千戶百戶等名目如左

一東路大都以北草地折連怯愛爾地哈刺赤千戶十九人按赤忽里哈赤千戶下百戶一人兀魯兀部阿八刺哈赤一人徹徹地一人薛裏溫尼裏溫幹脫忽赤一人哈思罕地一人玉尼伯牙斡頭山百戶一人

一東路上都周圍草地玉尼伯牙地哈刺赤百戶八人大幹爾朵位下百戶共九人

一東北哈刺木連河軍海子察罕海子等草地百戶十有四人

大幹爾朵位下百戶一人

一東北幹難河周圍草地百戶二人怯魯連河哈刺赤千戶一人百戶七人阿刺忽馬乞地百戶六人

大幹爾朵位下百戶二人

一東北怯魯連河等處草地千戶六人兀奴忽赤一人八刺哈赤一人

大幹爾朵位下百戶一人

一正北和林稱海等處草地阿察脫不罕地哈刺赤一人
幹川札馬昔寶赤一人火羅罕按赤一人成海後火義罕塔爾罕按赤一人黃兀不刺按赤一人應里哥地按赤一人應吉列古哈刺赤一人亦爾渾察西哈刺赤一人
人答蘭速魯哈刺赤一人哈爾哈孫不刺哈刺赤一人
大幹爾朵位下怯魯連火尼赤一人

一西方甘州等處草地置奧魯赤及總管等官共十一所
一京師左手永平等處草地分置哈刺赤拙里牙赤阿都赤
答刺赤亦爾哥赤香河按赤亦馬赤河西務愛牙赤

潮州哈刺赤昔寶赤等官各一人共九人

大幹爾朵位下河西務玉提赤百戶一人

一京師右手固安州四怯薛八刺哈赤各草地固安州哈刺赤一人眞定昔寶赤一人左衛哈刺赤一人青州哈刺赤一人涿州哈刺赤一人

一雲南亦奚卜薛草地千戶一人

一四川蘆州牧地哈刺赤一所

一山東益都牧地哈刺赤一所

一極北邊火里圖麻草地千戶一人

一極東邊高麗耽羅瀕海草地百戶無攷

屯田

古者寓兵於農漢魏而下始置屯田爲守邊要計元初用

兵征討遇堅城大敵如川東襄陽等處則必屯田以守之海內旣一於是內而各衛外而行省皆立屯田以資軍餉大抵芍陂洪澤寧夏瓜沙及關中涇白二渠因昔人之制地利不減於舊和林陝西四川等地因地之宜不遺其利至畿輔水利虞集諸人尤講求興舉事雖未行然實京畿無窮之利當時恃有海運置之不問及至正末年江南割據海漕不至卽講亦無及矣至南荒邊徼屯田養成以備蠻夷出不得已亦附著於篇俾後有攷焉

樞密院所轄

左衛屯田世祖中統三年調樞密院二千人於東安永清荒土及本衛元占牧地立屯開耕分置左右手屯田千戶所爲軍二千名爲田千三百十頃有奇

右衛屯田世祖中統三年調本衛軍二千人於永清益津等處立屯開耕分置左右手屯田千戶所其屯軍田畝之數與左衛同

中衛屯田世祖至元四年於武清香河等縣置立十一年以各屯地界相去百餘里往來耕作不便遷於河西務荒莊楊家口青臺楊家白等處其屯軍之數與左衛同爲田千三十七頃有奇

前衛屯田世祖至元十五年以各省軍入備侍衛者於霸州保定涿州荒地屯種分置左右手屯田千戶所屯軍與左衛同爲田千頃

後衛屯田與前衛同置後以永清等處田畝低下遷昌平縣之太平莊泰定三年以太平莊乃世祖營盤所在春秋

往來牧放衛士頭匹不宜與漢軍立屯遂罷之止於舊立屯所耕作如故屯軍與左衛同爲田千四百二十八頃有奇

武衛屯田世祖至元十八年發迤南軍人三千名於涿州霸州保定定興分設六屯別立農政院以領之自後與民相參屯種二十五年別立屯田萬戶府分管屯種軍人二十六年以屯軍屬武衛親軍都指揮使司兼領屯田事英宗至治元年命以廣備利民二千戶所耕地與左衛率府芒古台屯田千戶所互易屯軍三千名爲田千八百四頃有奇

左翼屯田萬戶府世祖至元二十六年罷蒙古侍衛軍從人之屯田者別以西域戍還漢軍及新附漢軍合併屯田

設左右翼屯田萬戶府以領之遂於大都路霸州河間等處立屯開耕置漢軍左右手二千戶新附軍六千五百名爲田千三百九十九頃有奇

右翼屯田萬戶府與左翼同置成宗大德元年發良定軍三百名於武清縣增置屯田仁宗延祐五年立衛率府以本府屯田并屬樞密分置漢軍千戶所三別置新附軍千戶所一爲軍千五百人爲田六百九十九頃有奇

忠翊侍衛屯田世祖至元二十九年命各萬戶府摘大同隆興太原平陽等處軍四千名於燕只哥赤斤地及紅城周迴屯田二千頃立大同等處屯儲萬戶府以領之武宗至大四年以黃華嶺新附屯田軍千人并歸本位別立屯署是年分屯軍二千置弩軍翼止以二千人分置左右手

屯田千戶所黃華嶺新附軍屯如故仁宗延祐二年遷紅城屯軍於古北口太平莊屯種七年十二月罷左都威衛及太平莊白草營等處屯田復於紅城周迴立屯仍屬中都威衛英宗至治元年始改爲忠翊侍衛屯田如故爲田二千頃

左右欽察衛屯田世祖至元二十四年發本衛軍千五百名分置左右手屯田千戶所及欽察屯田千戶所於清州等處屯田英宗至治二年始分左右欽察衛以左右手屯田千戶所分屬之文宗天祿二年復以龍翊侍衛隸焉左手千戶所田百三十七頃右手千戶所田二百十八頃欽察千戶所田三百頃

左衛率府屯田武宗至大元年命於大都路瀋州武清縣

及保定路新城縣置立屯田英宗至治元年以武衛與左衛率府屯田地界離隔不便耕作命互更易之分置三翼屯田千戶所爲軍三千人爲田千五百頃
宗仁衛屯田英宗至治二年發五衛漢軍二千人於大寧等處冊立屯田分置兩翼屯田千戶所爲田二千頃
宣忠扈衛屯田文宗至順元年命收聚訖一萬幹羅斯給地百頃立宣忠扈衛千戶所依宗仁衛例

大司農所轄

永平屯田總管府世祖至元二十四年以北京采木百姓三千餘戶於灤州立屯爲田萬有千六百十四頃有奇
營田提舉司在大都灤州之武清縣爲戶軍二百五十三民千二百三十五爲田三千五百頃有奇

廣濟署屯田世祖至元二十二年以崔黃口空城屯田歲
澇不收遷於清滄等處以尙珍署舊領屯夫二百三十戶
濟南河閒五百五十戶平灤眞定保定三路屯夫四百五
十戶并入之爲戶共千二百三十爲田萬二千六百頃有
奇

宣徽院所轄

淮東淮西屯田打捕總管府世祖至元十六年募民開耕
漣海等州荒地官給禾種自備牛具所得子粒官得十之
四民得十之六仍免屯戶徭役屢欲中廢不果二十七年
所轄提舉司十九處并爲十二其後再并止設八處爲戶
萬有千七百四十爲田萬五千有百九十三頃有奇
豐閭署世祖至元二十二年册立於大都路薊州之豐閭

縣爲戶八百有奇爲田三百四十九頃

寶坻屯世祖至元十六年僉大都屬邑編民三百戶立屯於大都之寶坻縣爲田四百五十頃

尙珍署世祖至元二十三年置立於濟寧路之兗州爲戶四百有奇爲田九千七百十九頃有奇

腹裏所轄軍民屯田

大同等處屯儲總管府屯田成宗大德四年以西京黃華嶺等處田土頗廣發軍民九千餘人設屯儲軍民總管萬戶府十一年放罷漢軍還紅城屯所止存民夫在屯仁宗時改萬戶府爲總管府爲戶軍四千有奇民六千爲田五千頃

虎賁親軍都指揮使司屯田世祖至元十七年月魯官人

言近於蔑涅怯土赤納赤高州忽蘭荅班等處改置驛可於舊驛設立屯田從之二十八年發虎賁親軍三千人入屯凡立三十四屯於上都置司爲軍三千人佃戶七十九爲田四千二百二頃有奇

行省所轄軍民屯田

嶺北行省屯田世祖至元二十一年并和林阿剌台元領軍千人入五條河成宗元貞元年摘六衛漢軍千人赴稱海屯田大德三年以五條河漢軍悉并入稱海六年分揀蒙古軍五千人屯田稱海七年命依世祖舊制稱海五條河俱設屯田發軍千人於五條河立屯英宗時立屯田萬戶府爲戶四千六百有奇爲田六千四百餘頃

遼陽行省大寧路海陽等處打捕屯田所世祖至元二十

三年以大寧遼陽平灤諸路漏籍放良孥蘭奚人戶及僧道還俗者立屯於瑞州之西立打捕屯田所爲戶元撥并召募共百二十二爲田二百三十頃有奇

遼陽行省浦峪路屯田萬戶府世祖至元二十九年以蠻軍三百戶女真百九十戶於咸平府屯種三十年命本府萬戶領其事三十一年罷萬戶府屯田仁宗大德二年撥蠻軍三百戶屬肇州止存女真百九十戶依舊立屯爲田四百頃

遼陽行省金復州萬戶府屯田世祖至元二十一年發新附軍千二百八十一戶於忻都察屯田二十六年分京師應役新附軍千人屯田哈思罕關東荒地三十年以玉龍帖木爾塔失海牙兩萬戶新附軍千三百六十戶并入金

復州立屯爲戶三千六百有奇爲田二千五百二十三頃遼陽行省肇州蒙古屯田萬戶府成宗元貞元年以乃顏不魯古赤及打魚水達達女眞等戶於肇州旁近地開耕爲戶不魯古赤二百二十戶水達達八十戶歸附軍三百戶續增漸丁五十二戶

河南南陽府民屯世祖至元二年詔孟州之東黃河之北南至八柳樹枯河徐州等處凡荒閒地令阿朮阿剌罕等所領士卒并漢軍屯田六年以攻襄樊軍餉不足發南京河南歸德諸路編民二萬餘戶於唐鄧申裕等處立屯八年散還元屯戶別僉南陽諸戶計立營田使司領之爲戶六千有奇爲田萬六百六十二頃

河南洪澤萬戶府屯田世祖至元二十三年立洪澤南北

三屯設萬戶府以統之先是江淮行省言屯田之利無過兩淮況芍陂洪澤皆漢唐舊屯若令江淮新附漢軍屯田可歲得糧百五十餘萬石至是從之三十一年罷三屯萬戶止立洪澤屯田萬戶府以統之其置立處所在淮安路之白水塘黃家疇等處爲戶萬六千爲田三萬五千三百十二頃有奇

河南芍陂屯田萬戶府世祖至元二十一年以安豐之芍陂可溉田萬餘頃發軍士二千人試行之後屯戶至萬有四千八百餘名

河南德安等處軍民屯田總管府世祖至元十八年以各翼漢軍及各路新附軍分置十屯立屯田萬戶府三十一年改立總管府爲民九千三百餘名軍五千九百餘名爲

田八千八百七十九頃有奇

陝西屯田總管府世祖至元十一年以安西王府所管編民二千戶立櫟陽涇陽終南渭南屯田十九年以怯憐口戶籍爲屯戶立安西平涼屯田設提領所以領之二十九年立鳳翔鎮原彭原屯田以舊僉接應成都延安軍人屬之令千戶所管領三十年復以軍屯爲民屯鳳翔千有百二十七戶鎮原九百十三戶櫟陽六百五十戶涇陽六百五十八戶彭原千二百三十八戶安西二百六十二戶平涼二百八十八戶終南七百十三戶渭南七百六十六戶爲田鳳翔九十頃鎮原四百二十六頃有奇櫟陽千有二十頃有奇涇陽千二十頃有奇彭原五百四十五頃有奇安西四百六十七頃有奇平涼百有十五頃有奇終南九

百四十三頃有奇渭南千二百二十二頃有奇

陝西等處萬戶府屯田世祖至元十九年以盤屋南係官荒地發歸附軍立軍屯二十年以南山把口子巡哨軍八百戶於盤屋屯田二十一年發文州鎮戍新附軍九百人立軍屯復以燕京戍守新附軍四百六十三戶於德順州立屯開耕爲戶盤屋三屯共八百四十六戶寧州大昌原屯四百七十四戶文州亞柏鎮屯九百戶德順州四百六十三戶爲田盤屋三屯共二百有三頃寧州大昌原百五十八頃有奇文州亞柏鎮二百六十八頃有奇德順州百有六十四頃有奇

陝西延安總管府屯田世祖至元十九年以贖身放良不蘭奚及漏籍戶於延安路探馬赤草地屯田爲戶二千有

奇爲田四百八十六頃

甘肅省寧夏等處新附軍萬戶府屯田世祖至元十九年發迤南新附軍千三百八十二戶往寧夏等處屯田二十一年遣塔塔裏千戶所管軍人九百五十八戶屯田爲田千四百九十八頃有奇

甘肅省管軍萬戶府屯田世祖至元十八年命肅州沙州瓜州置立屯田發軍於甘州黑山子滿峪泉水渠鴨子陂等處立屯爲戶二千二百九十爲田千有百六十六頃甘肅省寧夏營田司屯田世祖至元八年僉發隨州鄂州降人千有百七戶往中興屯田戶凡二千四百丁爲田千八百頃

甘肅省寧夏路放良官屯田世祖至元十一年以招收放

良人民九百四戶屯田爲田四百四十六頃

甘肅省亦集乃屯田世祖至元十六年調歸附軍人於甘州充屯田軍二十二年遷甘州新附軍二百人往屯亦集乃合卽渠開種爲田九十一頃有奇

江西省贛州路南安寨兵萬戶府屯田成宗大德二年以贛州路賊人出沒發寨兵及宋舊役弓手與抄數漏籍人戶立屯耕守以鎮遏之爲戶三千二百六十五爲田五百二十四頃有奇

江浙省汀漳屯田世祖至元十八年以福建調軍糧儲費用依腹裏例置立屯田命管軍總管發鎮守士卒不堪備征戰者又募南安等縣居民千八百二十五戶立屯耕作成宗元貞三年命於南詔黎畚屯田又汀州屯田二百二

十五頃漳州屯田二百五十頃

四川省廣元路民屯世祖至元十三年以廣元爲東西兩川要衝興屯得田九頃爲戶八十七又敘州宣撫司民屯至元十一年命四川經略使起立屯田舊史止有戶口之數其田若干頃無攷又紹慶路嘉定路潼川府夔州路重慶路成都路均於至元十九年立屯其畝數無攷蓋用兵之際不暇課耕雖有詔令官吏實未奉行也計紹慶路民屯爲戶九十一嘉定路民屯爲戶十二順慶路民屯爲戶五千有十六潼川府民屯爲戶二千四百有十二夔路總管府民屯爲戶五十六重慶路民屯爲戶三千五百六十成都路民屯爲戶九千有六十已上止有戶數無田數又保寧萬戶府軍屯爲戶千三百二十爲田百有十八頃敘

州等處萬戶府軍屯爲軍二百三十九人爲田四十一頃
重慶五路守鎮萬戶府軍屯爲軍千二百人爲田四百二
十頃夔路萬戶府軍屯爲戶三百五十人爲田五十六頃
成都等路萬戶府軍屯爲戶三百人爲田四十二頃灌州
崇慶州萬戶軍屯凡十一處共爲戶六千三百名爲田一
千二百頃有奇遂寧州軍屯爲戶二千名爲田三百五十
頃順慶等處萬戶府軍屯沿江下流漢初等處屯種爲戶
六百五十六名爲田百十四頃廣安等處萬戶府軍屯爲
軍百有十八人爲田二十頃皆世祖至元間所置

雲南省威楚提舉司屯田世祖至元十五年刷漏籍人戶
充民屯爲戶三十三爲田百六十五雙又大理金齒等處
宣慰司都元帥府軍民屯至元十二年冊立總民屯三千

七百四十一戶軍屯六百戶爲田軍民已業二萬二千有
百五雙又鶴慶路軍民屯田至元十二年冊立軍屯六百
八雙民屯四百雙俱軍民已業又武定路總管府軍屯至
元二十一年僉爨爨軍百八十七戶爲田七百四十八雙
又威楚路軍民屯田至元十五年刷本路漏籍人戶立民
屯給無主荒田四千三百三十雙餘戶自備已業田千有
百七十五雙二十七年以本路爨爨軍戶立軍屯官給荒
田六十雙餘戶自備已業田千五百三十六雙又中慶路
軍民屯田至元十二年刷所屬州縣內漏籍人戶立民屯
官給田萬七千二十二雙自備已業田二千六百二雙二
十七年用爨爨軍立軍屯官給田二百三十四雙自備已
業田二千六百一雙又曲靖等處宣慰司兼管軍萬戶府

軍民屯田至元十二年刷所轄州郡漏籍人戶立曲靖路民屯其田官給千四百八十雙自備己業田三千雙立仁德府民屯所僉八十戶官給田百六十雙二十六年僉爨爨軍百戶立軍屯爲田四百雙俱軍人已業又烏撒宣慰司軍民屯田至元二十七年以爨爨軍二百戶立軍民屯其田皆自備己業又臨安宣慰司兼管軍萬戶府軍民屯田至元十二年立計宣慰司所管民屯田六百雙本路所管民屯田三千四百雙二十七年續立爨爨軍屯爲田千有百五十二雙又梁千戶翼軍屯至元三十年梁王請以漢軍千人置屯於烏蒙後遷於新興州爲田三千七百八十九雙又羅羅斯宣慰司兼管軍萬戶府軍民屯田至元十六年立建昌會川德昌等民屯其撥編民二百戶二十

年立軍屯撥爨爨軍人百二十戶又烏蒙等處屯田總管
府軍屯仁宗延祐二年始立撥畏吾爾及新附漢軍屯田
爲戶軍五千人爲田千二百五十頃

湖廣省海北海南道宣慰司都元帥府民屯世祖至元三
十年冊立屯田成宗元貞元年以其地多瘴癘縱屯田軍
二千人還各翼畱二千人與召募民屯種大德三年罷屯
田萬戶府屯軍悉令還役止令民人八千四百二十八戶
屯田爲田瓊州路二百九十一頃雷州路百六十五頃高
州路四十五頃化州路五十五頃廉州路四頃

廣西兩江道宣慰司都元帥撞兵屯田成宗大德二年黃
聖許叛逃之交趾遺棄水田五百四十五頃募民屯種十
年平大任洞賊黃德寧等以其所遺叛產續置藤州屯田

二百有八頃

湖南道宣慰司衡州等處屯田世祖至元二十五年以軍士千四百餘名分屯衡州之清化永州之烏符武岡之白倉爲田清化屯百二十頃烏符屯百三頃有奇白倉屯八十六頃有奇

靖赤

元初起朔漠無文字其軍令宣傳皆遣親近侍衛口傳諭旨往還萬里無敢一字增減者自太宗始於塞外立驛亦不過使沙漠有水草之地立營帳止宿而未有文檄及平金以後得漢人教以文檄符印於是羽書四馳驛站之設當自此始其水陸舟車所傳璽書謂之鋪馬聖旨遇軍務之急則又以金字圓符爲信銀字者次之內則掌之天府

外則蒙古人之爲長官者主之其官有驛令有提領又置脫脫禾孫於關會之地以司辨詰皆總之於通政院及中書兵部而站戶闕乏逃亡則又以時僉補且加振恤焉於是四方往來之使止則有館舍頓則有供帳饑渴則有飲食而梯航畢達海宇會同其盛蓋古所未有也今著其大者然後紀各省水陸凡若干站而遼東焚站亦附見云

太宗元年敕諸牛鋪馬站每百戶置漢車十具各站俱置米倉站戶每年一牌內納米一石令百戶掌之比於使臣每日支肉麪米酒各有數其養馬之芻粟在外四年諭隨路官員遇使臣無牌面文字而給驛馬者皆罪之若遇軍急速及送納顏色絲段鷹隼係御用者雖無牌面文字亦驗數應付車牛

世祖中統五年詔站戶貧富不等每戶限四頃除免稅石以供鋪馬祇應以上田畝全納地稅至元七年立諸站都統領使司往來使臣令脫脫禾孫稽察八年中書省議鋪馬劄子初用蒙古字各處站赤未能盡識宜繪畫馬匹數目覆以省印庶無疑惑十一年命隨處站赤直隸各路總管府其站戶家屬令元籍州縣管領十三年改諸站都統領使司爲通政院十七年詔江淮諸路增置水站除海青使臣及事干軍務者方許馳驛餘者自濟州水站爲始並令乘船往來十九年詔給各處行省鋪馬聖旨揚州鄂州泉州龍興占城安西四川西夏甘州每省五道南方驗田糧及七十石者準當站馬一匹通政院臣言隨路站赤三五戶共當正馬一匹十三戶供車一輛自備一切什物公

用近年以來多爲諸王公主及正宮東宮位下頭目識認招收或冒入投下戶計者遂致站赤損敝乞換鋪站戶從之二十年免站戶和願和買一切雜泛差役增給甘州行省鋪馬聖旨十道總之爲二十道并增各省及轉運司宣慰司鋪馬聖旨三十五道江淮行省十道四川行省十道安西轉運司分司二道荆湖行省所轄湖南宣慰司三道福建行省十道都省差使繁多亦增二十道二十一年增給各處鋪馬劄子荆湖占城等處本省十道荆湖北道宣慰司所轄路分十六處每處二道山東運司二道河南運司七道宣德府三道江西行省五道福建行省所轄路分七處每處二道司農司五道四川行省所轄順元路宣慰司三道思州播州兩處宣撫司各三道都省二十道阿里

海牙所治之省鋪馬聖旨十道所轄宣慰司二處各三道二十二年以後各省遇有軍務出使外國或由上都增給圓牌無定數舊史縷述今不悉書

成宗大德八年御史臺臣言各處站赤祇應官錢多不依時撥降又或數少不給遂令站戶輪當庫子陪備應辦莫若驗使臣起數實支官錢所在官司依時撥降令各站提領毋得科配小民從之

武宗至大四年中書省言始者站赤隸兵部後屬通政院今通政院怠於整治站赤消乏合依舊命兵部領之制可中書省又言昨奉旨以站赤屬兵部今右丞相等議漢地之驛命兵部領之其鐵烈干納鄰末鄰等處蒙古站赤仍付通政院從之詔大都至上都每站除設驛令丞外設提

領三員司吏三名腹裏路分衝要水陸站亦設提領二員司吏二名其餘閑慢驛分止設提領一員司吏一名如無驛令量擬提領二員每百戶設一百戶三歲爲滿凡濫設官吏頭目盡罷之

仁宗皇慶二年以典瑞監掌金字圓牌及鋪馬聖旨三百餘道專爲軍情大事後多濫給以致至大四年金字圓牌不敷增置五十面自今求給牌面不經中書省樞密院者勿與延祐五年中書兵部言各站設置提領止受部劄行九品印職專車馬所領站亦多者三二千少者五七百戶體非輕細柰何俸祿不給三年一更貪邪得以自縱今後各處館驛除令丞外見役提領不許交換從之七年詔蒙古漢人站仍依舊制悉歸通政院其腹裏江南漢地站亦

依舊制命各處達魯花赤總管提調州縣官勿得預
泰定元年遣官振給帖里干木鄰納鄰等百九十站鈔二
十一萬三千三百錠糧七萬六千二百四十四石八斗北
方站赤每加津濟至此爲取盛

中書省所轄腹裏各路站赤

陸站百七十五處水站二十一處牛站二處

河南江北等處行省所轄

陸站百六處水站九十處

遼陽等處行省所轄

陸站百五處狗站十五處

狗站元設站戶三百狗三千隻後除絕亡餓死外實

在站戶二百八十九
狗二百一十八隻

江浙等處行省所轄

馬站百三十四處驛站三十五處步站十一處水站
八十二處

江西等處行省所轄

馬站八十五處水站六十九處

湖廣等處行省所轄

陸站百處水站七十三處

陝西行省所轄

陸站八十處水站一處

四川行省所轄

陸站四十八處水站八十四處

雲南諸路行省所轄

馬站七十四處水站四處

甘肅行省所轄三路

脫脫禾孫馬站六處

弓手

元制郡邑設弓手以防盜內而京司有南北兩城兵馬司外而諸路府所轄州縣設縣尉司巡檢司捕盜所皆置巡軍弓手其數多寡不同職巡邏專捕獲官有綱運及流徙者至則執兵仗導送以轉相授受外此則不敢役焉世祖中統五年隨州府驛路設置巡馬及馬步弓手驗民戶多寡定立額數除本管頭目外本處長官兼充提控官其夜禁之法一更三點鐘聲絕禁人行五更三點鐘聲動聽人行除公事急速及喪病產育之類不在此限違者笞州縣城池有相離五七十里其閒郵店及二十戶以上者設立

巡防弓手令本縣長官提調不及二十戶者依數差捕若無邨店處或五七十里冊立聚落店舍亦須及二十戶數其巡軍別設不在戶數之內關津渡口必當設立店舍弓手不在五七十里之限於本路不論是何投下當差戶每百戶內一名充役免差若有失盜立二限捕獲每限一月如限內不獲其捕盜官分別停俸弓手分別決杖有差如限內獲賊數及半者免之至元十六年分大都南北兩城兵馬各任捕盜南城三十二處弓手千四百名北城十七處弓手七百九十五名二十三年以巡捕舊止執棍反被賊弓矢所傷令給各路弓矢十副府州七副司縣五副仁宗延祐二年以各處弓手往往致害人命役三年者罷還

補換

急遞鋪兵

元制設急遞鋪以達四方之文書卽古者置郵傳命之法世祖時自燕京至開平府復自開平府至京兆始驗地里遠近人數多寡立急遞站鋪每十里或十五里二十五里則設一鋪中統元年詔各省設傳遞鋪驛每鋪置鋪丁五人各處縣官置文簿遇有轉遞文字卽注名件時刻令轉送下鋪交收本縣官司時察其稽滯其文字絹袋封記以牌書號綠油黃字外用夾板若邊關緊急事則用匣封鎖黑油紅字重別題號卽寫某處發遣時刻以憑勘遲速其牌匣以千字文爲號鋪兵一晝夜行四百里各路總管府委官每季提點州縣亦委官半月照刷有怠慢者分別笞罰處治其提點官亦分別連坐凡遞傳文字到鋪司卽令

鋪兵如法束繫齋小回厯一本急遞下鋪交割下鋪司驗到時刻總計角數及有無開折損壞於回厯上寫明回驗鋪兵必親行不許願替每鋪安置十二時輪一枚紅綽楔一座并牌額及上司行下諸路申上鋪厯二本遇夜常明燈燭二十八年中書省議近年入遞文字隨封隨發雜亂無時今後定制常行文字皆付承發司隨所投之地類爲一緘如往江淮行省者凡江淮行省不問是何文字通爲一緘其他急速之事別置匣遞凡步卒皆腰革帶縣鈴持鎗挾雨衣齋文書以行夜則持炬火道狹則車馬者負荷者聞鈴旁避夜亦以驚虎狼其響所及之鋪則鋪人出以俟其至囊板以護文書不破碎不襞積摺小漆絹以禦雨雪

鷹房捕獵

田獵之事歷代有之而遼金元皆起塞外其習尙尤甚元制自御位及諸王皆有昔寶赤蓋鷹人也一以習騎射懲宴安一以薦宗廟供天庖而資齒革羽毛之用地有禁取有時違者罪之每冬春之交天子或親幸近郊游豫縱鷹隼搏擊謂之飛放其獵有小打圍大打圍大圍之制凡用數萬騎各分東西而往凡行月餘而圍始合蓋不啻千餘里矣旣合則漸束而小之眾騎突出弓矢雨發鷹犬颯馳林木悲號聲震原谷虎狼熊羆麋鹿野馬豪猪狐兔之類山積輦運以十餘萬計獵將竟則開一門廣半里許俾餘獸得逸去以畱來歲遺種未獵之前隊長去其頭帽於東南方開生方之門如隊長復帽則其圍復合眾始獵亦古

者成湯祝網之意焉

見癸辛雜志續集

故鷹房捕獵皆有司存而

打捕鷹房人戶多取析居放良及漏籍孛蘭奚與凡曠役無賴者爲之除納地稅商稅依例出軍等六色宣課外並免其雜泛差自太宗乙未年鈔籍分屬御位下及諸王公主駙馬各投下及世祖時行尙書省嘗重定其籍夫御營獮狩可託之講武諸王駙馬鷹房可託之國俗然已大違其奉佛好生之誼至於中原河洛江淮並非巡幸所及而廣置鷹房等官及魚網提舉司捕禽入貢廣傷物命從古無此政體姑仍舊史所載以垂炯戒焉

御位下打捕鷹房官

一所權官張元大都路寶坻縣置

司元額七十七戶

一所王阿都赤世襲祖父職掌十

投下中都順天真定宣德等路諸色人匠打捕等戶元

額百四十七戶 一所管領大都等處打捕鷹房民戶
達魯花赤石抹耶失世襲祖父職元額百有十七戶
一所管領大都路打捕鷹房等官李脫歡世襲祖父職
元額百二十八戶 一所宣授管領大都等處打捕鷹
房人匠等戶達魯花赤黃耶速台世襲祖父職元額五
十戶 一所管領鷹房打捕人匠等戶達魯花赤伊刺
帖木爾世襲祖父職元額百五十七戶 一所宣授管
領打捕鷹房等戶達魯花赤阿巴赤世襲祖父職元額
三百五十五戶 一所宣授管領大都等路打捕鷹房
人戶達魯花赤寒食世襲祖父職元額二百四十三戶
諸王位下 汝寧王位下管領民匠打捕鷹房等戶官元
額二百一戶 普賽因大王位下管領本投下大都等

路打捕鷹房諸色人匠達魯花赤都總管府元額七百八十戶

天下州縣所設獵戶 腹裏打捕戶總計四千四百二十
三戶 河東宣慰司打捕戶五百九十八戶 晉寧路
打捕戶三百三十二戶 大同路打捕戶十五戶 冀
寧路打捕戶二百五十一戶 上都畱守司打捕戶三
百九十七戶 宣德提領所打捕戶百八十二戶 山
東宣慰司打捕戶三百九十七戶 山東宣慰司打捕
戶百戶 益都路打捕戶四十三戶 濟南路打捕戶
三十六戶 般陽路二十一戶 東平路三十四戶
曹州八十四戶 德州十戶 濮州三十一戶 泰安
州五戶 東昌路一戶 眞定路九十一戶 順德路

十九戶 廣平路十九戶 冠州五戶 恩州二戶
彰德三十七戶 衛輝路十六戶 大名路二百八十
六戶 保安路三十一戶 河間路二百五十二戶
隨路提舉司千有百九十戶 河間鷹房府二百七十
六名 都總管府七百五十六戶

遼陽大寧等處打捕鷹房官捕戶七百五十九戶 東
平等路打捕鷹房官捕戶三百九戶 隨州德安河南
襄陽懷孟等處打捕鷹房官捕戶百七十二戶 汝捕
提領所捕戶四十戶 高麗鷹房總管捕戶二百五十
戶 河南等路打捕鷹房官捕戶千有百四十二戶
益都等處打捕鷹房官捕戶五百二十一戶 河北河
南東平等處打捕鷹房官捕戶三百戶 隨路打捕鷹

房總管捕戶百五十九戶 眞定保定等處打捕鷹房
官捕戶五十戶 淮安路鷹房官捕戶四十七戶 揚
州等處打捕鷹房官捕戶七十二戶

宣徽院管轄淮東淮西屯田打捕總管府司屬打捕衙
門提舉司十處千戶所一處總萬四千三百二戶 淮
安提舉司八百五十八戶 安東提舉司九百十二戶
招泗提舉司四百六十五戶 鎮巢提舉司二千五
百四十戶 蘄黃提舉司千有百一十二戶 通泰提
舉司七百四十九戶 塔山提舉司六百四十四戶
魚網提舉司二千五百十九戶 打捕手號軍上千戶
所打捕軍六百四戶